

111 年度東門國小校內語文競賽客語(海陸腔)朗讀篇目二

編號 2 號

【拜阿公婆】李雪菱原作

這擺五月節，阿爸帶偌兜歸伙房人去敬阿公婆，有當多牲儀排在神桌頂，算算仔有五、六十戶。叔公講：「係講過年，人又會還較多，戴外背个會轉來，有七、八十戶恁多。」輪著點香个阿亮叔比手畫腳，指揮大家个牲儀排好勢。除了三牲以外，偌兜戴中央伙房个子孫，還會另外準備五碗炒好个齋菜，阿婆摺偌兜講係因為公太食齋，阿公講：「這係五燥五溼。」偌看有柿花、牛眼乾、麻米糲、冬瓜糖、地豆糖，還有炒好个香菇、木米、金簪、筍乾、冬粉這兜，偌心肝肚惱：「到底係公太愛食？還係偌兜好食？」

香燒好，愛等淳酒，大家開始打嘴鼓，該片有伯公講起頭擺戴在伙房，伙房分上析、中央、下析，敬阿公婆个時節有當多人。時代變咧，伙房戴毋落，後生仔搬出去落戶，這下斯伸三、四十戶定，看起來有滴仔冷落，所以過年過節大家愛轉來團圓。

這片个細阿叔講：「頭擺下析个阿木叔，豬欄厝野生一頭杙仔樹，阿葉哥會帶偌兜歸陣細姪仔去摘杙仔來食，係分阿木姪看著，會擎袂齊來追，害偌兜走到尾瀉屎，毋知愛去哪園正好，到

這下想起還會發痲驚。」大家聽著哈哈大笑。你一嘴、偌一句，笑聲滿廳下，實在鬧熱。

這堆叔婆、伯姆企在神桌厝，指等毋知哪家个雞仔，緊阿腦講畜到恁肥，又縞到恁靚。細阿姪分大家看到面紅紅，當歡喜講係佢个。叔婆幹頭摺阿姊講：「你兜旨嫁个細妹仔來看一下，左魚、右肉、雞中央，愛記得！毋好排毋著哦，係無會分人笑。」

另外一片个細後生仔企共下，手叮拿等手機，畫過來畫過去，有時交頭接耳講一下，有時問愛仰般下載影片；還有人戴等耳機搖來搖去，一看就知在該聽熱門音樂。外背禾埕町¹，一大陣細猴仔跔等老弟走上走下、追來追去，毋知搞麼个遊戲？看毋識哦！

阿亮叔喊：「淳酒、淳酒，銀紙愛先散便。」仰恁遽呢？嘴鼓都還旨打煞，全部人跔轉去各家淳酒，一下仔大家就無閒直掣，交手亂串。三到酒過後、斯燒銀紙、打紙炮咧。

鬧鬧熱熱个伙房，一大落嫲²个生趣事，永遠都講毋煞，跔等酒香摺紙炮聲傳出來，這係幸福个香，這係幸福个聲！

¹ 禾埕町：音 vo tang nen`；晒穀場上。

² 一大落嫲：音 rhid tai+ lab ma；形容數量很多。